

समे – 12:25

<><><><><><>

1st Phase Campaign

पैहले आले डोडा जिले दिये 8 सीटें पर पहले गेड़ तैहत वोट पाए जांगन। एनसी कांग्रेस गठबंधन गी मेद ऐ जे चऊं सीटें पर किश लीडरें दे चुनां थमां हटने मगरा हालात उंदे पक्खै च होई जांगन, जिल्ले के भाजपा ते पीडीपी बी अपने प्रतिद्वंदिये गी मात देने ताई पूरा जोर ला करदे न। डोडा, किशतवाड़ ते रामबन दे 8 विधानसभा हल्के दे कन्नो-कन्नी दक्खन कश्मीर दे चार जिले-अनंतनाग, पुलवामा, शोपियां ते कुलगाम च फैली दिये 16एं सीटें पर 18 सितंबर गी पैहले चरण च मतदान होआ करदा ऐ। 90 मिम्बरी जम्मू-कश्मीर विधानसभा लेई चुनां त्रै चरणे-18 सितंबर, 25 सितंबर ते 1 अक्तूबर गी करोआए जा रदे न। वोटें दी गिनतरी 8 अक्तूबर गी करोआई जाग। 2014 मगरा ते 2019 च दफा 370 हटाने परेंत एह जम्मू-कश्मीर च पैहले विधानसभा चुनां न।

<><><><><><>

J&K Star Campaigners

जम्मू-कश्मीर च बीजेपी दे चुनां प्रचार गी बढ़ावा देने ताई प्रधानमंत्री नरेंद्र मोदी, अमित शाह ते पार्टी दे होर दुए वरिष्ठ मंत्री 8 सितंबर थमां केंद्र शासित प्रदेश पुज्जने आहले न। भारतीय जनता पार्टी दे इक सीनियर लीडर नै दस्सेया जे प्रधानमंत्री मोदी दुए गेड़ दौरान प्रचार ताई जम्मू-कश्मीर आई सकदे न, पर होर दुए मंत्री पक्के तौरा पर 10 सितंबर थमां जम्मू-कश्मीर दा दौरा लाडन। मेद ऐ जे प्रधानमंत्री नरेंद्र मोदी जम्मू-कश्मीर च दऊं रैलिये गी संबोधित करडन, रैलिये दिये तरीखें गी मुक्कदा रूप दित्ता जा'रदा ऐ। लोकसभा च विपक्ष दे नेता राहुल गांधी अत्तरू 4 सितम्बर गी जम्मू कश्मीर दे दऊं विधान सभा क्षेत्रें च चुनां रैलिए गी संबोधित करगंन। उंदा रामबन जिले च बनिहाल ते अनंतनाग जिले च डुरु थाहर चुनां रैली च शामिल होने दा कार्यक्रम ऐ।

<><><><><><>

BJP Membership Drive

भारती जनता पार्टी अज्जै थमां अपनी सदस्यता आला अभियान गी शुरू करा'रदी ऐ। इस अभियान दी शुरूआत प्रधानमंत्री नरेन्द्र मोदी होरें बीजेपी अध्यक्ष जे.पी.नड्डा हुंदे आस्सेआ उंदी सदस्यता गी नमें सिरेया शुरू करने लेई प्रमाण पत्र देने कन्नै होग। मजूदा सब्बने सदस्ये गी अपनी सदस्यता नमें सिरेया शुरू करने दी लोड़ ऐ। बीजेपी मूजब हर 5एं-6एं ब'रें च सदस्यता अभियान नमें सिरेया चलाया जंदा ऐ। एह अभियान अज्जै थमां शुरू होइयै 10 नवम्बर तगर केई चरणें च चलाया जाग। इस अभियान तैहत पैहला चरण 25 सितम्बर गी समाप्त होग। व्यक्तिगत तौर पर मिस्ट्र कॉल राएं जां पार्टी दी वैबसाइट जां होर कोई डिजीटल प्लेटफार्मे पर साइन-अप कीता जाई सकदा ऐ।

<><><><><><><><>

JK-Congress List

कांग्रेस पार्टी दी केन्द्री चुनां कमेटी दी अज्ज लग्गने आली बैठक दे बाद मेद ऐ ते जम्मू कश्मीर विधानसभा चुनां दे दुए ते त्रीए गेड़ लेई पार्टी अपने मेदवारें दे नाएं दा एलान करी देग। पार्टी सूत्रें जानकारी दित्ती ऐ जे पार्टी दे राष्ट्रीय अध्यक्ष मल्लिकार्जुन खरगे हुंदी अध्यक्षता च लग्गने आली इस बैठक च पार्टी दे साबका अध्यक्ष ते लोकसभा च पार्टी दे नेता राहुल गांधी हुंदे इलावा पार्टी दे होर केई बड्डे नेता मजूद रौंहगन। सूत्रें मूजब कुल भारत कांग्रेस कमेटी दे संगठन महासचिव के.सी.वेनुगोपाल चिरे रातीं मेदवारें दी सूचि जारी करी देंगन।

<><><><><><><><>

Poonch Election Preparedness

पुंछ जिले च औंदे विधानसभा चुनाएं लेई त्रुटी रैहत तैआरिएं ते बंदोबस्तें गी जकीनी बनाने लेई जिला चुनां अफसर विकास कुंडल होरें कल जिले दे बक्ख-बक्ख हिस्से च मतदान केन्द्रें पर उपलब्ध कराई जाने आलिएं सुविधाएं दा जायजा लैता। कल इक जायजा बैठक सदिदयै जिला चुनां अधिकारी होरें जिले दे सब्बने मतदान केन्द्रें पर जकीनी तौरा पर उपलब्ध करोआई जाने आली सुविधाएं बारे तफसीली जानकारी हासल कीती। भारतीय चुनां आयोग आस्सेआ जारी दिशा निर्देशें मूजब हर मतदान केन्द्र पर ए.एम.एफ मतलब एश्योर्ड मिनीमम फ़ैसिलिटीज दी दस्तयाबी अत्त लाजमी ऐ। जिने सुविधाएं पर चेचे तौरा पर गल्लबात कीती

गेई, उंदे च पीने आले पानी दी बवस्था, साफ सफाई, शौचालय, बिजली दी सप्लाई, शारीरिक चुनौतिएं दा सामना करने आले दिव्यांग मतदाताएं लेई रेंप ते मतदाताएं दी सहूलत लेई इस चाल्ली दियां होर दडुयां जरूरी सुविधा शामिल न।

<><><><><><>

GST-Collection

इस ब'रे दे अगस्त म्हीने दरान मुल्ख च 1 लक्ख 75 ज्हार करोड़ रुपें दा जीएसटी राजस्व हासल होआ ऐ जेहड़ा पिछले ब'रे दे अगस्त म्हीने कठेरे गेदे 1 लक्ख 59 ज्हार करोड़ रुपे दे जीएसटी कोला कोई 10 प्रतिशत मता ऐ। रिफंड जारी करने शा पैहले केन्द्र सरकारै 30 ज्हार 862 करोड़ रुपे जदके राज्य सरकारें 38 ज्हार 411 करोड़ रुपे दी जीएसटी किट्ठी कीती ऐ।

<><><><><><>

Udhampur Sankari Mela

त्रै रोजा ऐतिहासक सांकरी मेला जेहड़ा उधमपुर जिले दे पंचैरी ब्लाक च 30 अगस्त गी शुरू होआ हा, ओह शांतिपूर्ण ढंगै सिर सम्पन्न होई गेआ। इस दरान श्रद्धालुएं दा खासा रश ते उत्साह दिखेआ गेआ। केन्द्र शासत प्रदेश दे बक्ख-बक्ख हिस्से थमां श्रद्धालु इत्थें मत्था टेकने लेई आए। इस दरान बक्ख-बक्ख शिक्षा इदारें ते लोक कलाकारें आस्सेआ अपनियां प्रस्तुतियां दित्तियां गेइयां। जिनेंगी उत्थें मजूद दर्शकें आस्सेआ खूब सराहेआ गेआ।

<><><><><><>

Vasuki Nag Temple

जम्मू कश्मीर धमार्थ ट्रस्ट आस्सेआ त्रै रोजा श्री वासुकी नाग कैलाश यात्रा कल भद्रवाह कस्बे च पारम्परिक पूजा अर्चना ते रीति रिवाजें कन्नै सम्पन्न होई गेई। एहदे शा पैहले पवित्र छड़ी मुबारक कैलाश कुंड थमां होइयै भद्रवाह दे गाथा स्थित ऐतिहासक वासुकी नाग मंदरै च पुज्जी। धमार्थ ट्रस्ट दे प्रधान ब्रिगेडियर रटैर आर.एस.लंगेह होरें यात्रा दे समापन मौके यात्रा गी कामयाब बनाने च सैहयोग देने आले सब्बने लोकें दा आभार प्रगट कीता। उनें आखेआ बजंत्रिएं ते पारम्परिक लोक कलाकारें ते संगीत वादकें दी बदोलत यात्रा दरान इक

आध्यात्मिक ते संगीतमयी माहौल बने दा रेहा। जेहदी उनें रज्जियै सिफत कीती। ध्यानजोग ऐ जे कैलाश कुंड कोई डेढ मील दे दायरे च फैली दी शीशे आला साफ सुथरे पानी दी झील ऐ जेहड़ी सतह समुंद्र कोला 77 ज्हार 700 फुट दी उंचाई पर स्थित ऐ। ऐसी मानता ऐ जे कैलाश कुंड शिवें दा अस्सल निवास हा जिसी ओ वासुकी नाग हुंदे सपुर्द करियै हिमाचल प्रदेश दे मोरमोर इलाके च वाका मनी महेश उठी गे हे।

<><><><><><>

Paraolympic

पैरिस पैरालंपिक खेड्डें दे 5में रोज अज्ज भारत गी बक्ख-बक्ख मकाबलें च होर तगमे दी मेद बनी दी ऐ। जम्मू कश्मीर दे दऊं तीरंदाज शीतल देवी ते राकेश कुमार मिक्स्ट कंपाउंड ओपन च अपना दमखम दस्सने लेई परतियै तैआर न। एहदे शा पैहले इनें दौनें पैरा तीरंदाजें सांझे तौरा पर 1 ज्हार 399 दा स्कोर बनाइयै इक नमां पैरालंपिक्स रिकार्ड कायम कीता ते हून ओ क्वार्टर फाइनल लेई अगड़े बधगंन। भारत 1 सुन्ने दा, 2 चांदी दे ते 4 कैह दे तगमे सनें कुल 7 तगमें हासल करियै मैडल तालिका च 27में नंबर पर ऐ। तोआई कल चौथे रोज भारतीय पैरा खडारी प्रिति पाल होरें इक होर तगमा भारत दे नां कीता ऐ। उनें महिलाएं दी 200 मीटर 7.35 दे फाइनल च कैह दा तगमा जित्तेआ। इस जित्त कन्नै ओह भारत दी पैहली ऐसी महिला ट्रेक एंड फील्ड पैरा एथलीट बनी गेइयां न जिनें इक्कै पैरालंपिक च दो तगमे जित्ते न। उआं भारतीय खडारी निशाद कुमार होरें बी मर्दे दे हाई जंप टी-47 इवेंट च 2.04 मीटर उच्ची छाल मारियै चांदी दा तगमा अपने नां कीता।

<><><><><><>